

19  
GALAXIÆ EXHIBITIO

sive

DISPUTATIO ANATOMICA

De

DUCTU THORACICO  
CHYLIFERO,

Quam,

Fortunante DEO

pro loco ut vocant,

*Publicæ ac placide Amplissimorum Academico-  
rum Procerum ventilationi submittit,*

JOH. DANIEL DORSTENIUS,

Med. Doctor ejusdemque Professor

Ordinarius publicus

*Respondente*

CASPARO CHRISTIANO SCHETLA,

Wetzlarienti.

*In Athenæo majori ad Lanum*

*ad diem 16. Augusti.*

— 0 —

MARBURGI CATTORUM,

Typis SALOMONIS SCHADEWITZII, Acad. Typ.

Anno M. DC. LXXVIII

25

*Serenissimo ac Potentissimo  
Principi ac Domino,*

DOMINO  
CAROLO,  
HASSIÆ LAND-  
GRAVIO, PRINCIPI  
HERSFELDIÆ, COMITI  
CATTIMELIBOCI, DECIAE, ZIEGEN-  
HAINÆ, NIDDÆ, & SCHAUM.  
BURGI, &c. &c.

*Patri Patriæ, Principi ac Domino  
suo Clementissimo*

Dissertationem hanc in devotissimæ subjectionis monumentum, cum perennis salutis ac sanitatis, vitæ longævæ, perpetuæq; felicitatis voto

*humillimè offert*

Joh. Daniel Dorstenius, D.




Scientia nostra umbra in C<sup>le</sup> est, multum quidem egerunt veteres scripseruntq<sup>ue</sup>, verum tantum abest peregerint omnia, ut ignorarint potius infinita, quum maxima pars illorum quæ sciuerunt, minima sit eorum quæ sequentium nos docuit temporum industria. De Galeno pronunciauit nonnemo, omnia illum ad artem Medicam spectantia habere. Magnus quidem ille fuit artisquæ diuæ pomaria amplissimè lucubrationibus suis extendit, ut etiam Deiservus sit dictus. Verum omnia illum sciuisse vel operosis voluminibus comprehendisse, recentiorum confutant inventa. Pelagus sanè quoddam, perimmensum atquæ profundum ars est Medica, ita ut submersa sepultaquæ in eo latitent adhuc per multa, unde nec ulli nato post mille etiam secula præcludetur via aliquid eruendi, artiquæ huic adjiciendi. Stetit Medicina nostra ab Hippocratis temporibus ad secula nostra, parumquæ profecit; Verum hoc in seculo studia Inprimis Anatomica & Chymica tantum augmenti cœperunt, ut nulla fermè ætas, aut indagandis naturæ arcanis curiosior, aut inveniendis felicior, hâc nostrâ illuxerit, quorum tamen felicitatem DEO referimus acceptam & oculatis scrutantium manibus. Exempla multa in scenam hanc producere, instituti nostri ratio non patitur; prodeat saltem unicum illius Joh.



*Pecqueti vel potius Bartholomæi Eustachii inventum, ductus nempe thoracis chyliferus; inventum sanè magni in medicina, usus & commodi, siquidè ratio multorum <sup>quædamque</sup> affectuumq; in corpore nostro reddi facilius potest, quæ hætenus vel ignorare, vel longè per ambages repetere coacti fuimus, ita ut verum sit, quod suo tempore quoque fassus est Tertullianus, inquiens: Ipse orbis in promptu est, cultior indies & instructior pristino. Recentiorum multi tam fervidè in studio hoc laborant ac si tota Anatomie hæc nostra ætate ad summum perfectionis culmè sit evehenda ac deducenda. De distributionis chyli viis controversiarum serram duxere omni ævo Anatomici, ducuntque adhuc multi, dum vel titubanter ductum hunc, aut nunquam ab ipsis visum, aut nervum recurrentem pro eo ipsis demonstratum credunt, vel veterum authoritati tam firmiter inhaerent veluti Sisyphi saxo alligati, ut sine piaculo non ausi sint vel latum unguem à trita via deflectere. Quà de re cum præterito hoc semestri brumali in Sectionibus Anatomicis fuerim occupatus, ac in primis ductū hunc cum chylifero Sacculo, ejus incilibus innumeris valvulisq; non semel ostenderim; nullū argumentum, quamvis aliarum rerum copia certatim semibi commenda verit, in præsentiarum dignius judicavi, quàm ductum thoracis chyliferum. Cujus historiam feliciter ut tradam tu Triune Deus clementer prospice cœpto.*





§. I.



Ubi diaphragmatis appendicibus cellula in quam chylus è lacteis mesaraicis influit non inconvenienter à Pecqueto nomen receptaculi primitus obtinuit, quandoque etiam bursulam dixit receptaculum hoc & ductum ascendentem nominavit thoracicum. Cellulam hanc non sine causa van Horne saccum lacteum appellare maluit: Bartholinus glandulas lacteas lumbares nominat; Charle-ton eandem conceptaculi Pecquetiani nomine ab inventore designat: Diemerbrock non minus bene receptaculum lymphæ, quam chyli appellari posse autumat; cum chylus tantum per intervalla in illud delabatur, lymphæ vero influxus continuus sit: Rolfincius distributoria lactea thoracica vocat: Bilsius roriferum ductum nuncupat; Alii aliter cisternam, chyli penum, vesicam &c. cognominant; quam ultimam denominationem incommodam censet Bartholinus, cum nutritium succum non excrementitium contineat.

*Ductus chyli-feri Synonyma:*

II.

Multum quidem Pecqueto eo nomine etsi debeamus, quod hujus cognitionem per integrum fermè seculum altis tenebris Anatomicorum inscitiâ sepultam, suâ diligentia, nullo duce: potius casu, magno Medicinæ comodo in lucem protraxerit perfectioremque reddiderit,

*Primus inventor quis?*



tamen non est, quòd de primâ inventionetotam ipsi adscri-  
bamus gloriam; nam centum fermè abhinc annis idem du-  
ctus in equorum dissectione omnium primò observatus &  
notatus fuit à Bartholomæo Eustachio, qui libro de vena si-  
ne pari antigr. 13. ita scribit: Itaque in illis animantibus (lo-  
quitur de equis) ab insigni trunco sinistro jugali, qua po-  
sterior sedes radicis venæ internæ jugularis spectat (putat  
subclaviam, quâ parte eam jugularis desuper ingreditur)  
magna quædam propago germinat, quæ præterquam  
quòd in ejus origine ostiolum semicirculare habeat (valvu-  
lam clarè designat) est etiam alba & aquei humoris plena  
nec longè ab ortu in duas partes scinditur, paulò post rursus  
coeuntes in unam, quæ nullos ramos diffundens, juxta si-  
nistrum vertebrarum latus, penetrato septo transversò de-  
orsum ad medium usque lumborum fertur, quo loco latior  
effecta, magnamque arteriam complexa, obscurissimum  
finem, mihi quæ adhuc non bene perceptum, obtinet. Ex  
his patet ductum hunc ab Eustachio omnium primò fuisse  
inventum & observatum, quamvis usus ipsi non satis fue-  
rit cognitus, describit enim illius principium à subclavia,  
ubi tamen finis est, & rursus finem in lumbis, ubi prin-  
cipium est. Itaque primam sed rudiorẽ detectionem de-  
bemus Eustachio, accuratam verò & perfectam cognitio-  
nem ac demonstrationem Pecqueto aliisque.

### III.

Situs. **D**uctus huius situs est in thoracis cavitate prope renes  
sub emulgentibus & diaphragmatis appendicibus in-  
ter musculorum lumbarium *ῥῶς* capita, non exactè tamen  
in omnibus medium lumborum locum servat, non obser-  
vat enim natura *ἀκριβῶς* Mathematicam, sed in brutorum  
anima-



animalium subjectis quæ hætenus secui ad dextrum magis receptaculum hoc inclinasse latus semper visum fuit ab æstantibus, quamvis Bartholinus & alii plerumque in brutis ad sinistrum latus deflectere id velint. Verum utut sit si-ve plerumque ad dextrum, si-ve sinistrum inclinet latus, parum commodi inde hauritur; E contra autem situs profundus altioris est indaginis; non tantum enim ad tutelam spectat, dum ab antica parte ductus hic inter vasa nobilia arteriam magnam descendantem & venam cavam ascendentem ut & œsophagum pleurâ contectus; posticâ verò parte inter vertebrae lumborum & dorsi locatus reperitur; verum etiam ad chyli motum & expressionem faciliorem, præsertim in erecto corporis situ non parum conducit; Diaphragmatis enim appendices, quibus subjacet, distendi aut contrahi nequeunt in respiratione, quin & ipsam receptaculum distendant aut premant, ad quam pressuram Bartholinus musculos *quos* suas quoque conferre operas rectè credit.

#### IV.

**D**uctus hic cum sacculo substantiâ constat membrana. Substantia.  
 cæâ admodum tenui & simplici, quantum hætenus observare potui, quæ ad levissimum cultri vel manus contactum rumpitur; minimè verò glandulosâ ut imbibere possit succum chylosum, quemadmodum scribit Rolfincius ex Bartholino, qui glandulosam ejus substantiam vidisse perhibet; nullam enim cum glandulis substantiæ similitudinem habet, ut observarunt quoque Clariss. Radbeck & Diemerbroeck; hinc superius dictum non sine causa nominati sacculum chyliferum; hic in sua cavitate chylium continet vel lympham,



## V.

**Magnitudo.** **I**N magnitudine multum variat, cum in brutis, tum in hominibus, plerumque tamen calamo scriptorio crassitudine respondet, ita tamen ut circa receptaculum, quod spatium inter lumbares musculos ad renes plus minus implet, amplior, in progressu verò angustior credatur.

## VI.

**Numerus.**

**Q**uemadmodum autem ductus hic magnitudine, ita & numero quoque variat, plerumque tamen unus censetur, quod Bartholinus sex hominum, plurimumque brutorum sectione cum aliis confirmat; Circa medium quidem thoracis ubi ad sinistrum latus juxta œsophagum cui membranæ communis beneficio adhæret, in duos ramos divisum, paulò post verò rursus coeuntēs semper observavi; exinde autem duplicem colligere statim ductum minimè fas erit. Propagines hæc idè duæ sunt & velut scalæ latera mutuo inter se communicant iterumque coeunt, si forsitan in una propagine obstructio aut compressio ob partes adjacentes &c. obtigerit, chylus per alteram liberè ascendere possit, quoniam sanguis vitæque ipsa à continuo recentis chyli influxu dependet, necesse fuit ut per vasa libera & expedita in eum transeat.

## VII.

**Figura & Color.**

**F**iguram quod attinet, ovalis ea aut potius pyramidalis observatur. Color candidus est, dum lacte turget.

## VIII.

**Insertio.**

**I**nsertio ordinariè fit in venam subclaviam sinistram, cum in hominibus, tum in brutis, rarissimè in utramque, & vix in centesimo animali id inveniri arbitratur Clar. Diemerbr.



**V**alvulas multas agnoscit hic ductus; in sacculo tot quot *Valvulae.* ramuli inseruntur; In medio ductus aliquot ubi in binos ramos abit & denique circa insertionem ne sanguis præterlabens aperturæ ejus incurrat, oppletionemque inferat, ideò in primis huic ostio valvula est obducta, quæ sanguinem à vena jugulari & axillari redeuntem rejiciat & obtento quasi velo foramen illud ab irruentis sanguinis affluxu præmuniat, reliquæ verò chyli & lymphæ ascendentes regressum impediant. Ex eo satis manifestum quod contentus chylus digito faciliè sursum adigi, deorsum verò pelli minimè queat; Et quòd ductu alicubi pertuso lacteus quidem succus ab inferiore parte sursum tendens effluat, verum à superiore parte intra valvulas subsistat, neq; ad inflatum vulnus descendat; præterea quòd per immissum tubulum flatus aut per siphonem injectus liquor faciliè sursum ascendat, deorsum verò repelli nequeat.

X.

**D**uctus hujus ramulos ad alia loca non excurrere communis etsi hætenus fuerit sententia, ratio tamen & usus seu effectus conjecturam non levi ad mammas uterum & vesicam quoque derivari, efficiunt; Imò eorum præsentiam etsi non omnium tamen quorundam oculatissimorum Anatomicorum autopsia confirmare videtur. Ita Everhardi tract. de ortu animal. in cuniculo lactante manifestam vasorum lacteorum deductionem ad mammas observavit. Horum, inquit, ductuum nonnulli ex trunco descendente oriundi excurrentes super musculos abdominis, subter pinguedinem, glandulosæ mammarum substantiæ materiam lactis suggerebat, qui tubulos postmodum manifestos satis constituebant ex quibus lac in communem canale deducitur,

*Lacteorum ramorum ad ubera propagationes.*



citur, perq; papillam exhauritur. Pecquetus quoque dis-  
sert. de lact. thorac. exper. 4. Monspeli anno 1654. co-  
ram experientissimo Riverio invenit ac demonstravit in  
catella lactante, propè tertiam costam superiorem lacteum  
canalem ad mammas pertingentem è quo satis magna la-  
ctis copia efferebatur; quod experimentum sæpius itera-  
vit in catellis lactantibus, pari semper lactis uberrimi ex ru-  
pto vasculo effusione, quoties juxta primas thoracis costas  
ab exterioribus partibus sectionem inciperet: Ex bifurca-  
tionibus hunc ramulum procedere antea animadvertenterat,  
qui non subclavio canali inferebatur, sed quasi furtim ver-  
sus axillam inter thoracis musculos divertebat. Non mino-  
rem quoque Schenekius in cane lactante dissecta furculum  
lacteum pleno cursu extra abdomen ad ubera tendentem  
conspexit, qui compressus succum suum in papillam eructa-  
vit largeq; exstillavit. Ludovicus de Bils in Belgica apolo-  
gia contra Joh. van Horne depingit quidem vascula quæ-  
dam à circulo lymphatico in collo sito versus mammarum  
glandulas descendentia quæ lactea esse falsò putat, non di-  
stinguens, inter lymphatica & lactea vasa ut notat Clariss.  
Diemerbr. lib. 1. cap. 11. p. 89. Nos in cane lactante maci-  
lenta per 4. aut 5. circiter horas iusculis & cibis ante stran-  
gulationem bene pastâ, furculum è ductu thoraico, prope  
insertionem in subclaviam lacte plenum & turgidum thymi  
substantiæ inferi, eâque compressâ, liquorem albicantem ad  
ubera effundi & protrudi manifestè vidimus; unde verum  
thymi usum vix perfectè notum esse suspicor, ut alia occa-  
sione D. v. demonstraturus sum.

XI.

Ad ubera ma-  
miliæ

**A**D uterum lacteos ramos quoque transire, licet hacte-  
nus à nemine adhuc visi aut demonstrati sint, suspicio-  
nes



nes tamen non leves persuadere conantur. Ipse Hippocrates libr. de Natur. pueri §. 27. in fine inquit; tendunt & in mammas & in uteros venulæ hæ & consimiles aliæ, & ubi pervenerint in uteros de lacte puer ipso paululum fruitur. Sententiam hanc defendendam suscepit Harvejus; rationes ejus signitas, vid. in Anatomia Bartholiniana pag. 264. quas inter palmaria est, quòd in ventriculis & intestinis similis materia & instar lactis coagulati conspiciatur; Non minora distributionis hujus indicia subministrat lac seu chylus ex utero profluens; quemadmodum Laurentius, Zacutus & alii testantur se vidisse quamplurimas puerperas, quæ per uterum maximam lactis copiam excrevère. Ipsa quoque medicamenta assumpta dum non rarò ad uterum illæsa brevissimo hoc tractu perveniunt, sicuti practicum Heurnii, ab Heer & aliorum observata confirmant, in difficili partu, dato croco, foetus croco tinctos prodiisse.

XII.

Quemadmodum nunc lacteorum ad mammas & uterum ramificatio, ita ad vesicam vasorum horum dispersio veritati consentanea censetur, dum perpendimus, quòd illi qui aquas acidulas vel alium liquorem diureticum copiosius bibunt, intra semihoræ spatium sæpè tres quatuor pluresve seri libras emingant; Imò res solidas ac duras, ut semina anisi, fœniculi aliæq; duriora deglutita, per urinam reddant, sine ulla cordis alteratione; quod tamen vix possibile videtur, tantam seri crudi nec colorati copiam, substantiasque illas duras tam citò per vasa lactea, venam cavam ad dextrum cordis sinum, hinc per angustissimos & tortuosissimos pulmonum mæandros ad sinistram cordis thalamum, indeque per aortam & artérias emulgentes perque renum filamenta meatusq; capillares ad vesicam sine

*Ad vesicam  
ductus lactei.*



noxa & incommodo insensibiliter demandari : Qua de re, variarum sine sanguine cum lotio excretarum substantiarum exstant exempla, Ita Ephemer. Medic. Germ. Tom. 1. observ. 147. Petroselinum incisum in iusculo assumptum cum urina excrevit rusticus. Tom. 2. Ephemer. obs. 3. Officulum per □m excrevit vir generosus. Officulum pruni Damascenicum magna copia □æ, organicem reddidisse refert Sachsus. Observ. 168. tom. 2. Ephem. ex observatione & relatione D. Olai Borrichii plumbum per □m excretum fuisse à viro manducante ante triduum aviculas grandinibus plumbeis interfectas (mit Schrot;) similiter acum æneam à fabro argentario Regio ex ejusdem observ. Imò quinque acus ex improvise deglutitas, virginem quandam cum □ reddidisse, refert Langius 2. epist. 40. Acum capillarem deglutitam quatuor digitos transversos longam in vesicam venisse, in eaq; post mortem repertam fuisse scribit Alexander Benedictus l. 3. anal. cap. 9. Parvum clavum ferreum, per imprudentiam deglutitum, diu post cum evulso calculo è vesica extractum fuisse (calculus enim circum clavum undequaq; accreverat ejusq; primum fundamentum fuerat clavus) refert Joh. Matthæus Hesses histor. rarar. casu 1. Aciculam mediocrem deglutitam cum □a reddidit uxor Isbrandi de Diemberbrock, nec quicquam mali ab ista acicula persentiit, ut ipse testatur libr. 1. Anat. c. 17. Julius Alexandrinus annotat. ad cap. 14. lib. de subst. facult. natur. frustula radicum apii pridie commestorum, nummuli quadrantis magnitudine, cum □ excreta observavit. Florentinus ferm. q. tract. 4. cap. 29. refert quendam qui fungos non exactè masticatos comederat, notabiles eorundem particulas cum □ excrevisse. Plutarch. lib. 8. sympos. probl. 9, scribit historiam viri, qui post longam



gam □æ difficultatem, culmum hordeaceum geniculatum excrevit. In Mensium suppressione laborantibus & inde factis cachecticis aliquoties in □ semina hordeo excorticato non absimilia, forsitan à jussulis hordeatis coctionem primā subterfugientibus excreta, observavit D. Waldschmid, Academiae hujus Professor & Collega noster honorandus. Hæc omnia nunc angustissimos renum & papillarum poros, fibrillasq; urinarias transisse aut transire & transcolari ut nullus sanguis comitetur, omnem fidem & rationem superat: Vias itaque has cum Clariss. Diemerbroeck suspicor esse, vasa quædam lactea, licet occulta & hactenus incognita, ad vesicam abeuntia, quæ licet non in omnibus, tantum in quibusdam hominibus adeò potula esse possunt ut non tantum serum copiosum, ut in potioribus, & ipsum chylum lacteum, unde □a chylosa, verum & res quoque solidas transmittere queant. Suspicioni huic non parum roboris addere videntur, dum Nicolaus Florentinus Serm. 5. tract. 10. cap. 21. refert, se novisse juvenem trigenarium, qui quotidie præter □m copiosam, sine ullo incommodo eminxit lactis quantitatem medii urinalis. Ita Capellus Medicus quoque, teste Bauhino, vidit mulierem quæ dimidium cyathum lactis è vesica excrevit. Andreas Laurentius libr. Anat. quæst. 10. nonnullas puerperas plurimam lactis copiam per uterum & vesicam excrevisse observavit. Ex his jam apparet, lactea quædam vasa non solum ad mammas; verum etiam ad uterum & vesicam pertingere, quæ ultima ad vesicam in statu naturali serum, in p. naturali chylum aliasque res transvehere possunt; quam ob causam tam rarò chylum lacteum ad vesicam defluere existimandum est.



XIII.

*Ufus lacteo-  
rum.*

**U**Sum deniq; hujus ductus quod attinet, is est, chylum tempore distributionis primariò, secundariò verò factâ in primis distributione lympham ad venam subclaviam devehere, ut in illa sanguinis ad effervescentiam in corde faciendam præparatio quasi fiat; Chylus enim ibidem sanguini venoso admistus, cum eoq; per cavam ad cor delatus, in sanguinem mutatur.

XIV.

*Chyli distri-  
butio.*

**C**hylum unâ cum lymphâ venam subclaviam ingreditur atq; inde per cavam ad cor deferri, ex eo patet, quòd lac copiosum siphone in ductum hunc chyli ferum injectum mox in subclaviam hinc in cavam & dextrum cordis ventriculum, unâ cum sanguine cavæ inhærente deferatur, ac per vulnus isti ventriculo inflictum effluere conspiciatur.

XV.

**V**ariæ adhuc ex hoc usu in praxi emergunt utilitates, multaq; phænomena explicari facilius possunt: Unde nempe momentanea sit illa restauratio à cordialibus exhibitis; Variorum quoq; effectuum causæ dispalescunt; Consensus scil. ventriculi cum corde; Syncopalis febris ex ventriculo; Palpitationis cordis post cibum copiosum, viscosum, pulsuumq; mutationis cibo assumpto, videatur Hogelandi œconom. animal. pag. 63. Mortis inopinatæ vel per venena vel vulnerationem; atrophix in gibbositate à compressis & obstructis thoracicis lacteis; doloris in dorso & mammis tempore lactationis; & simil;

XVI.

*Totus chylus  
subclaviam  
intrat.*

**Q**uæstio hic non levis incidit, an per hunc ductum totus chylus ad subclaviam tendat? an verò etiam pars ipsius venas rubras mesaraicas ingressa ad hepar ascendat? Nos  
totum



totum ad subclaviam transire cum Clarissimo Diemerbro.  
censemus, eò excepto, qui vel in mulieribus gravidis ordi-  
nario cursu progreditur ad uterum, & in lactantibus ad  
mammas, vel cursu extraordinario interdum ad vesicam.  
Alteram sententiam acriter defendere Deusingius cona-  
tur Exerc. de chylicat, & chyli motu, his rationibus.

1. Nulla, inquit, proportio naturæ congrua existit in- *Deusingii sen-*  
ter innumerabiles lacteas venas per mesenterium sparsas, & *tentia.*  
thoracicos ductus, qui plerumq; tantum unicus est, chylum  
ulteriùs ad venas axillares devehentes. 2. Quomodo du-  
ctus thoracicus tantam chyli quantitatem per tot vasa lactea  
ad chyli receptaculum advectam, sine incommodo trans-  
mitteret? 3. Tantilla exigua chyli portio, quanta per thora-  
cicos ductus ad venas axillares & cavam deducitur, mini-  
mè sufficit resarciendo continuo sanguinis, per universum  
corpus agitati atque effervescentis dispendio, ut nec conti-  
nuæ omnium partium detritiioni reficiendæ. 4. Cum  
multum chyli generetur, & pauxillum duntaxat per angu-  
stias thoracici ductus transire possit, ubinam mansurus est  
residuus chylus, qui inter utrumq; pastum per exilem tho-  
racicum ductum transire non potuit? 5. Illa maxima chyli  
pars, quæ tempore imprægnationis & lactationis fertur ad  
uterum & mammas, quorsum fertur illa extra tempus im-  
prægnationis & lactationis, cum per ductus thoracicos eam  
transire non posse verosimile sit? 6. Si ductus thoracicus  
in vivo animali citissimè vinculo intercipiatur, motus lactei  
liquoris in mesenterio non inhiberi deprehenditur, cum  
tamen nihilominus venæ lacteæ sensim evanescant. Tan-  
dem subjicit experimentum Ludovici de Bils, qui Cani vivo  
dissecavit abdomen, eo facto, arterias & venas mesaraicas à  
se invicem separavit & omnibus arteriis ligaturam injecit,  
ita



ita ut nullum sanguinem in venas amplius transfundere poterint, tunc abdomen rursus consuit, & sic canem per quatuor aut quinque horas in vita, ope alicujus liquoris per os infusi conservavit, usque dum cibi ante hanc sectionem dati in chylum sint mutati: tunc denique rursus aperto abdomine, vasa interiora quae sivit & arterias omnino vacuas, sed venas turbulento quodam liquore, coloris obscure cinerei repletas invenit; Unde exacte ipsa autopsia sententiam suam probari putat.

## XVII.

*Responsio.*

**V**erum tantum efficaciae argumenta illa, quantum quidem promittitur non continere, nec acutissimo invento ipsam veritatem suffragari cum Clariss. Diemerbr. sentio. Ad primum igitur & secundum respondetur, non minorem, imò multò majorem esse proportionem vasculorum lacteorum melaraicorum cum uno vel duobus ductibus thoracicis, quàm est tot innumerabilium venarum, à capite, pedibus brachiis, aliisve quibusvis partibus delatarum, cum una vena cava, in quem omnes se exonerant: nam si tot venarum myriades spectentur, illae omnes decuplo plus sanguinis in cavam exonerare videbuntur, quàm vel cava capiat, vel commodè à se dispellere possit: Quia tamen hoc sine tumultu & incommodo fieri cernimus, quid mirabimur, quòd illud ipsum etiam convenienter fiat in vasis lacteis? Præterea chyli processus non est tam continuus, quam sanguinis. Denique si à simili liceat argumentari, videndum quantum feri per angustos uteretes brevi tempore transeat; si hoc sine ulla molestia in iis fiat, quare etiam per vasa lactea & canalem thoracicum tantundem transire negabimus?



Ad tertium & quartum. Non esse tantillam seu exiguam portionem chyli quæ per thoracicos ductus transit, sed copiosam, ut per autopsiam patet, hæcque hyeme in mollo manifestè observavimus, ubi è sacculo chyliifero tanta post disruptionem copia chyli effluebat, ut adstantes in admirationem raperet. Huc facit quoque Experimentum Loweri, qui in vivo cane, perforato interdum thoracis dextro latere, receptaculum chyli propè diaphragma digito laceravit, consutoque externo vulnere, canem in vita servavit beneque saginavit, sed ut ut copiosè cibatus intra triduum inedia confectus exspiravit; aperto cadavere, invenit chylum totum expulsum ad aliquot libras in illud thoracis latus, quo vulneratus fuerat, apertisque venis sanguis crassior & sero destitutus nec ulla chyli admistione refocillatus visus fuit. Et quamvis seriam impenderit operam, variaque fecerit experimenta, tandem tamen sibi constitit, totum chyli penū, nulla alia via quam per ductus chyliiferos thoracicos in sanguinem infundi; Si enim cursus ejus per vasa thoracica impediatur, animal qualicumque cibo satiatum intra paucos dies fame penitus interibit.

Ad quintum dicitur, magnam quidem chyli partem per ductus thoracicos fluere solitam, tempore imprægnationis & lactationis ferri ad uterum & mammas, & quia defectu istius chyli aliorum delati corpus mulieris non satis nutritur, hinc mulieres illas, si modo sanæ, natura impellente, esse magis famelicas, ut edendo & bibendo suppleri possit ille defectus: quòd si verò mulieres istæ vitio partis alicujus non sint satis famelicæ, sed vel paucò & solito minore fruuntur alimento, tunc illas ob chylum ad foetus nutritionem aliorum delatum, admodum debilitari & penitus emaciari, ut quotidiana docet experientia.



Ad sextum refertur ; quòd intercepto ductu thoracico & moriente animali, videamus quidem lacteas mesaraicas, partim à vicinis incumbentibus partibus pressas, partim in se concidentes, sensim evanescere, sed non, quia chylus venas mesaraicas ingreditur, verùm quia in sacculum chyliferum & ductum thoracicum infunditur, qui tunc chylo præter solitum valde turgent ac distenduntur : Cùmque in eos plus infundi nequit, tunc etiam circa magnam glandulam mesenterii in lacteis thoracicis subsistit, in iisque per integrum diem & diutius conspici potest, quæ non fierent, si venas mesaraicas rubras ingrederetur.

Ad experimentum Bilsi reponitur, prorsus invalidam esse inde sumptam probationem ; Frustrà enim experimentum illud semper tentavit Lowerus : Etiam, si rem penitus inspiciamus, comperiemus sanguinis in venis Mesaraicis contenti neque colorem, neque consistentiam, neque quantitatem unquam docere posse chylum per illas vias transire : Sanguis enim in venis mesaraicis contentus, ratione partis per quam decurrit, per se non nihil fœculentior & magis turbidus, quàm sanguis aliarum partium bene temperatarum. Sanguis itaque proposito, experimento, in venis mesaraicis istum colorem ac consistentiam fortè nactus, quia ob injectas ligaturas continuò arteriosi sanguinis affluxu, nulla facta refocillatio ; ut taceam sexcentas alias causas, dum vel ob anastomoses vasorum lymphaticorum cum venoso simul genere ; vel ob pravam partis aut totius constitutionem, quemadmodum in cachecticis & scorbuticis observamus, quibus & aliis textura sanguinis venosi facile mutari potest, ut alia inde luminis fiat modificatio.

Restarent adhuc Harveji argumenta nonnulla resolvenda,



venda, quibus omnia impugnare conatur lactea vasa: Verum cum jam Ole meridiano clarius, dari vasa lactea, sponte sua diffluunt.

Claudimus hos cerivos de chyliifero rivo considerantes illud Senecæ, quod rerum natura sacra sua non simul tradat, nec arcana ejusdem promiscuè, nec omnibus pateant, redacta sint & in interiori sacrario clausa, ex quibus aliud hæc ætas, aliud postera accipit & depromit; interim Deo *τῷ θεῷ*, soli sanitatis remuneratori sit laus, honor & gloria, in sempiterna secula.



## COROLLARIA.

1.

*Chylus per artem produci potest.*

2.

*Mictio puris aut sanguinis renum aut vesicæ exulcerationem non semper notificat.*

3.

*Dentes generantur infantibus in utero.*

4.


*Apostolus Paulus, quum sub impio Neronis dominatu ad supplicium duceretur, capite amputato, lymphæ & lactis undam naturaliter profudit, si vera quæ in actis narrantur.*

5. Bilis



*Bilis non est in sanguine.*

*Humor in amnio & chorio contentus non est humor excrementitius.*



## *Vir Experientissime.*

**D**ies diem docet, & quæ sphæram intellectus superare olim videbantur, nunc obstetricante Anatomia è difficultatum latebris emergunt spontè, & nostro in seculo in scenam introducuntur ab illis, qui in Verba Magistri non jurarunt. Ductum describis Thoracicum, & Chyli Semitam cultro ad artem composito & stylo graviori ostendis, Remque Medicam cum aliis ex imo facis enatare ad summum. Gratulor itaque Tibi, Vir Nobilissime, ex Animo devoto cum voto, ut spartam hanc prosperâ valetudine, Secundâ Fortunâ & Animo Constanti plures geras in Anos. Hoc vovet

*Tuus ex Animo*

J. J. W. D.